



MONITORIZASAUN HO ADVOKASIA BA SEITOR SIGURANSA  
MONITORIZAÇÃO E ADVOCACIA DO SECTOR DE SEGURANÇA  
MONITORING AND ADVOCACY OF THE SECURITY SECTOR

Fundasaun Mahein (FM), 07 Jullu 2026

Komunikadu Imprensa

## **Fantasma sira iha Díli: Lakuna sira iha Aviasaun, Rede Scam, no Teste ida ba Soberania Timor-Leste**

Fundasaun Mahein (FM) lansa relatóriu foun ho títulu "*Fantasma sira iha Díli: Lakuna sira iha Aviasaun, Rede Scam, no Teste ida ba Soberania Timor-Leste*" (Mahein Nia Lian Nú. 167). Relatóriu ida-ne'e analiza insidente jet privadu Cessna Citation 700 Longitude ne'ebé tun iha Aeroportu Internacional Díli iha loron 1 fulan-Jullu tinan 2026 ho dokumentu falsifikadu ne'ebé uza Xefi Estadu nia naran.

Xefi Estadu publikamente denúnsia koñesimentu no haruka ona asaun legal hasoru hahalok ne'e. Pasajeiru na'in-tolu ne'ebé asosiadu ho voo ne'e deskonfia iha ligasaun ho operasaun scam call center iha Tibar, Liquiça. Sira hetan autorizasaun sai ho voo komersial iha dadeer tuirmai, entretantu jet privadu ne'ebé atu transporta sira nain tolu nafatin para iha aeroportu, no depois fila ba Indonézia.

Relatóriu FM hatudu katak insidente ne'e la'ós anomalia izoladu ida. Iha fulan-Setembru tinan 2025, investidor bilionáriu Xina na'in-rua to'o ho jet privadu Bombardier Global Express no simu iha terminal VVIP ho inspesaun ne'ebé mínimu. Sira treinu kilat iha Liquiça ho fasilitasaun husi membru PNTL. Kazu sira ne'e hatudu padraun esplorasau sistema nian.

UNODC (Setembru 2025) alerta katak krime organizadu transnasionál uza "investimentu diretu estranjeiru kriminal" (criminal FDI) hodi tama iha Timor-Leste. Oecusse Digital Centre (ODC) iha risku atu sai "paraísu krime" hanesan Sihanoukville, Kamboja. Iha ne'ebé ikus mai Governu suspende atividade ne'e.

FM identifika vulnerabilidade estrutural oioin, inklui sistema integridade dokumentu ne'ebé fraku no fragmentasaun institusionál entre Autoridade Aviasaun Civil Timor-Leste (AACTL), Servisu Migrasaun, no PNTL. Frakeza sira-ne'e sai aat liután tanba aplikasaun protokolu VIP nian ne'ebé maka ultrapasa prosedimentu seguransa padraun nian. Nu'udar rezultadu, laiha instituisaun ida deit maka mantein vizaun jerál operasionál ida ne'ebé komprensivu kona-ba insidente refere.

## **FM nia Rekomendasaun Polítika no Operasional**

### 1. Rekomendasaun Polítika:

Governu tenke estabelese polítika nasional ida ne'ebé trata seguransa aviasaun, migrasaun, no prevene krime organizadu transnacional nu'udar área ida ne'ebé interligadu, la'ós setor separadu. Polítika ida-ne'e tenke define responsabilidade klaru entre Autoridade Aviasaun Civil Timor-Leste (AACTL), Servisu Migrasaun, PNTL, no entidade relevante sira atu evita fragmentasaun institucional. Governu mós tenke fortalese mekanizmu supervizaun ba utiliza marka no naran xefi estadu ka autoridade sira-nian, atu prevene manipulasaun dokumentu no abuzu polítika no símbolu estadu nian.

### 2. Rekomendasaun Operasional:

Iha nível operacional, tenke implementa imediata kontrolu estritu ba voo charter no voo privadu hotu, inklui verifikasaun obrigatória ba dokumentu, objetivu viajen, no identidade pasajeiru antes de autorizasaun sai. Tenke estabelese sistema notifikasaun real-time entre aeroportu, migrasaun, alfandega, no unidade seguransa sira atu deteta anomalia no responde lalais. Tenke mós halo auditória independente ba funcionáriu no prosedimentu ne'ebé posivelmente fasilita insidente sira hanesan ne'e, hodi identifika falla operacional no kriminal.

### 3. Medida Prioritária sira:

Iha tempu badak, prioridade sira tenke inklui suspensaun autorizasaun ba operador la rejista iha Timor-Leste, formasaun konjunta kona-ba detesaun dokumentu falsifikadu, no verifikasaun estrita ba viajen VIP sira. Iha tempu médiu, governu tenke investe iha sistema verifikasaun dokumentu dijital no plataforma partilla informasaun entre instituisaun relevante sira. Iha tempu naruk, integrasaun entre rejistu aviasaun, imigrasaun, no inteligéncia tenke sai prioridade hodi suporta sistema "Advance Passenger Information" (API).

### 4. Asaun Institucional:

Tenke forma mekanizmu koordinasaun permanenti ida iha nível nasional ba monitorizasaun voo sensível, análise risku, no resposta ba insidente seguransa aviasaun. Unidade espesializada ba krime organizadu transnacional tenke hetan rekursu sira, treinamentu, no mandatu operacional ne'ebé klaru atu investiga kazu sira ne'ebé liga ho scam, falsifikasaun dokumentu, no mobilidade suspeitu. Governu mós tenke garante investigasaun komprensivu no tarjetu ba kazu ida ne'e hodi garante responsabilizasaun no prevene repetisaun.

FM subliña katak “jet siluman” semo sai tiha ona, maibé vulnerabilidade sei kontinua. Ida-ne’e nu’udar teste todan ba soberania Timor-Leste nian. Governu, sosiedade sivil, no parseiru internasional sira tenke responde ho asaun konkretu.

Atu hetan informasaun liutan kona-ba análize ida-ne’e ka atu asesu ba relatóriu kompletu, favor vizita ami nia sítiu oficial: [www.fundasaunmahein.org](http://www.fundasaunmahein.org).

Kontaktu:

**Fundasaun Mahein (FM)**

Email: [mahein2009@gmail.com](mailto:mahein2009@gmail.com)

Telemovel: (+670) 75771766